

- 3140 so dat al de dere worden vorveret.
de lupardus by deme konninge stunt,
he was des konninges nâ geboren vrunt,
he sprak: wat is doch dit gewêrt,
dat gy ju sus sere vorvêrt?
- 3145 al were de konniginne ôk dôt:
latet varen desse ruwe grôt!
grypet enen môt, it is anders schande!
sy gy nicht here van deme lande?
it is jo under ju al dat hier is.
- 3150 De konnink sprak: is dat so wis,
so latet ju dat nêen wonder syn,
dat ru myn herte lydet pyn
edder dat ik sus hebbe misgelât.
my heft mit syneme bosen berât
- 3155 ên quât schalk so vêrne gebracht,
dat ik myne vrunde hebbe vorvracht,
den stolten Brunen unde Ysegrin:
dat ruwet my in dème herten myn.
dat wil sêr an myne ere gân,
- 3160 dat ik so vele hebbe misgedân
jegen myne allerbesten barone,
unde ik dème quaden horensone
also vele scholde betruwen.
men it quam al tô by myner vrouwen;
- 3165 se bat vor ene so vele tovore,
dat ik ere bede moste horen:
dat is my lêt, al isset to spade;
al ere rât kumt my to quade. —
De lupart sprak: horet my, konnink here,
- 3170 mojet ju darumme nicht altosere!
is dâr misgedân, men schalt sonen;
men schal dem wulve unde Brunen dem konen,
ôk Gyremode, der vrouwen fyn,
dessen schal men geven der ram Bellyn,
- 3175 wente he bekende sulven openbâr unde blôt,
dat he rât gaf to Lampen dôt;
dit schal he wedder betalen unde kopen!
denne wil wy alle na Reinken lopen;
konne wy, he schal wêrden gevangen,
- 3180 unde nicht vele wôrde, men vórt uphangen!
wente he kan syne wôrde so slicht,
kumt he to wôrden, men hanget ene nicht.
mit desser sone, dat wêt ik wal,
Brunen unde Ysegrime wol nôgen schal. —